

可

園

文

存

可園文存卷六目錄

序下

賞月前集詩序

賞月後集詩序

周梅溪姑丈遺稿序

一切經音義通檢自序

金陵建置沿革表序

甘劍侯江上春歸圖序

徐棣友空帷鑒月圖序

送朱子期赴浙序

送方子涵從使英俄序

擬編續中西紀事敘例

張楚珩濟上鴻泥圖序

楊子穆觀察七十壽序

鄭母朱太孺人六十壽序

丁禮民教授七十壽序

司馬晴江八十壽序

可園文存卷六

江甯陳作霖伯雨

序下

賞月前集詩序

鳳陽之地夙號瘠貧土著之人類多朴野雖當春秋佳日賓客勝遊詩酒之盟我聞蓋眇周範亭先生予姑祖也旅寄是邦雅稱選事乃於今年下元之夕爲賞月之會家大人及子元叔均被招邀作霖因得廁其後侍太邱之杖履紹大阮之風流聯襪盍載於茲爲極盛焉時則薄霧作暝輕風蕩雲主人敞南軒開東閣酒氣浮甕羹材溢筵待賓皆了髻之童入座無屠沽之侶舊雨踐其夙約客星聚以極歡觥籌甫行璘轡已舉始徘徊於樹杪旋注射於階墀樹影童童覆如圓

蓋花香裊裊盪作輕煙於是端牘抽毫送鉤射覆杯浮大白而戰捫燭刻寸紅而騰箋宵氣送寒有酒可敵漏聲催曉無詩不歸葛蘿託而羈旅之感消萍水逢而觴咏之情洽不適足見主人厚貺並能爲荒寂之區生色哉同會者凡十人其危坐不飲而監酒政者江浦金子鳴步鑾也掀髯大笑強云不醉與望月思家情見乎辭者子鳴同縣張味之永清吳允中堯法也不勝酒力逃席先去者上元錢樸之棫也以詩挑戰者主人之孫鏡涵桂清浦雲桂珍也對客揮毫先成二律者山陰董集亭謙也總錄諸君詩若干首而撰是序者江甯陳雨生作霖也

賞月後集詩序

歲在丁巳十一月旣望范亭主人復招同人於南軒玩月追

舊歡也酒酣作霖乃執爵而言曰夫文字唱酬杯盤錯雜當
星月交輝之夜極主賓款洽之情不過四座高朋一時雅集
從未聞賦傳赤壁仿坡老之後遊觀到元都溯劉郎之前度
者而況春當二月喧傳銅馬之謠浪煖三篙競泛漁人之棹
烏棲靡定燕巖難安黯黯濠雲王粲著登樓之賦悠悠淮水
蘭成生作客之愁雖復湖山嘯傲風月流連等頗米之蹤訪
楚懷之蹟避暑洪湖堤上聽泉會景亭邊野鷺沙鷗盡成伴
侶樵夫牧子時答謳歌然皆刻意苦吟同入東林之社飛觴
共醉未開北海之尊幾疑盛會難逢嘉筵莫再已而乃裴度
得平淮蔡杜陵復返成都二月遷府貽十月復還鳳陽殘菊留黃寒梅綻
白室添獸炭活火圍爐酒熟鵝兒清香出甕倘使瓜期已及
華宴仍虛則天上嫦娥未免爽其前約座中佳士幾教負此

良宵將何以邀蟾魄之清光尋鴻泥之陳迹此賞月後集所以不能已也嗟嗟幾度桑田徒增感慨一輪桂影又到團欒觸梁公望雲之心時家君在野踵希逸賦月之筆詩成金谷諸君既各關心兵序仿蘭亭賤子請再爲嚆矢

周梅溪姑丈遺稿序

夫覽蓼莪而興感無非孝子之辭擊如意以狂歌便是窮塗之哭自來天懷激發蒿目艱虞未有不託諸詩篇形爲詠嘆者也梅溪先生以歐陽之少孤遭黃巢之大亂故園殘破閒道微行骨肉流離慈暉遽失藁葬雖從郭外危地猶是賊中使重念其單傳或稍緩其奔赴誰得而相議者而乃兩泣縱橫星行匍匐闔關直入痛不顧身盜骨以歸淚惟餘血幸獲鬼神之佑未逢豺虎之凶而哀毀莫勝心力交瘁膏肓之疾

已伏於是矣自時厥後或指賊媢罵誓不俱生或對天歌呼
情難仰問或眠歷終宵而不寐或酒飲數斗而不休愁積三
年疴纏一載孔彰草檄莫愈頭風長吉嘔肝遂成心疾蓋其
憂思鬱結有不至滅性而不止者也猶憶當日者危城出走
實賴挈提大廈同依復緣推愛相依三月略見平生每當入
社聯吟擇言尤雅梁公登華感白雲之在天拾遺入秦盼銀
河之洗甲雖流連草木游覽山川皆不出此二意焉及對風
木而興悲遂學春秋之絕筆故稿中所存祇數十篇而已嘗
顧語作霖曰此雖不足言詩然一時情懷藉是以達予盍爲
我序之以自相怡悅乎其時作霖握衣辟呬遜謝未遑也今
先生久歸兜率子衡昆仲復奉母潞州歷歷之遊難尋夢裏
諄諄之約猶在耳中慨宿諾之未償悵九京之永隔秋聲在

樹觸緒懷人季札留挂劍之情向秀有聞笛之歎悄然燈下振筆書之寄示子衡惟祝其善保手澤毋爲雷電所取將且以誌作霖之不忘舊德也嗚呼

一切經音義通檢自序

繫夫六書之訓故至唐乃集其大成小學之源流惟釋亦分其別派一切經音義者蓋唐沙門慧琳之所彙輯而遡沙門希麟之所廣補也其時華夏同文之盛廣被鯁泐高麗慕化之心尤崇象教凡屬梵函之祕盡爲大藏之儲世歷千載而云遙書寄三韓而亡恙直至明神宗之代倏遭平秀吉之師溺上兵來入府先收圖籍蜀中使返輕裝悉載詩書是冊流傳遂歸日本獅谷蓮社葉之於始高野寶院印之於終都爲一百一十卷兩部相承單行已久以東洋之叢爾備西藏之

大觀洵可謂禪苑功臣藝林別子矣顧何以海外有截紅蠟之蝕無虞中原多故白馬之馱不再慨宋元之迭代屢易滄桑悵文獻之無徵矧茲貝葉雖以永樂大典之浩博儀徵相國之蒐求猶未能仰證前聞獲窺全帙故

四庫未收書目所載者厘元應羣經音義二十五卷及慧苑華嚴音義四卷而已海市旣開使星四出偶過鄰環之福地得覘梵夾之遺編火衍傳薪賴大千眾之施送珠還合浦從長崎島以攜來豈不足津逮後人宣昭來哲也哉惟是經皆分部解各隨經不熟諸經難尋真解每索塗而摘埴競問目而叩槃學者病焉作霖識愧管窺迷思鍼指欲得貫通之法別求簡易之方東海無際旣匯眾流南山雖高豈無捷徑於是抽毫削牘提要鉤元遵康熙字典之部居仿說文通檢之

條例某卷某頁注於各字之旁三言五言悉以末字爲斷內
典則略爲採掇譯音則概付闕如至於彙引篇名別爲疏證
上觀千古頗多未見之書守在四夷敢斥異端之學凡茲所
述其類實繁經始於甲午之秋斷手於乙未之夏曠時曠日
比博奕而差賢一物一名校蟲魚而更瑣雖不足堂登大雅
聊藉以牖啟羣蒙云爾

金陵建置沿革表序

予曩撰江甯通紀彙七邑大事備書之郡縣之興罷亦參錯
其中特未易尋其端緒欲別創一提挈之法俾閱者了然於
目因懶中輟心常歉焉會同里傅荅生上舍以金陵建置沿
革表見眎讀竟全帙嘆爲史才迹其分條厥有四善夫一統
之時每輕割據京師之外不數行都意爲輕軒何關形勢茲

則地憑天塹表重鎮於臨江名從主人合九朝爲一例其善
一也至於一縱一橫鳥飛難直四至四到大牙或交地有插
花界空表樹茲則自下立縣不以屬潤而致疑浙西畫疆詎
因治昇而妄改其善二也若乃地異名同東西莫準前置後
廢今古攸分稱謂倘淆鹵莽殊甚茲則揚州本於禹貢無與
廣陵之衝丹陽斷自唐時不混曲阿之號其善三也又或流
人所聚主客相傾軍府周環兵民未洽撫茲擾擾不免齟齬
茲則南朝僑郡概從土斷之科明代衛營亦入版圖之列其
善四也噫周應合建康志表旣涉於煩蕪汪悔翁南史地志
補編又疏於校勘則謹嚴簡要豈非志地者之權衡哉予衰
年多故神智日昏麟角牛毛諒不能有所成就此之造述實
獲我心比於魯南所編證圖經而悉合宜乎君苗老去欲筆

研之俱焚也已

甘劍侯江上春歸圖序

在昔范蠡旋越天地重清應氏歸洛陌阡不識庾肩吾東還
吳郡杜少陵西入羌村類皆經鋒鏑之餘慰家山之思枌榆
社老滄桑感深而況楊柳紅橋舊宅近長干之里芙蓉碧幕
元戎成六月之功劫已了於昆明水仍飲夫建業張季鷹非
爲蓴味始掉扁舟潘安仁親奉板輿載瞻衡宇此江上春歸
之所爲名圖也劍侯先生江東獨秀冀北空羣述祖德則韋
孟門高論通家則孔融誼重猶憶癸丑之夏初逢丙舍之閒
慘綠雖同屬少年垂青偏引爲知己月明酌句日永敲棋夷
甫縱其清談鄱陽雜以暴譴相見恨晚容登元禮之門無以
爲家許作孟嘗之客斯時也封狼在邑文豹隱山望塵市而

迢遙念家山之殘破王官谷僻表聖潛蹤玉女窗敲子山興
感城夢古治難尋逸少之遊臺過通天欲上初明之表然亡
不越竟旅未焚巢人疑桃洞之仙地少荏苒之警爰得我所
俟焉三年旣而羅落橋邊靈寶之氛漸逼青溪柵上申子之
眾欲奔先生乃池魚懼殃栖鳥擇屋過伍子投金之瀨問蘇
公焚券之橋萍寄越吳查浮瀛海千里轉徙始定居於楚州
十載磨研遂戰馘於日下雖向燕臺而西笑壯志不衰而見
鴻翼之南飛歸心屢動伏牀吟苦誰知莊鳥之情麾弱功高
惟盼顧榮之捷無何圓成月暈歲屆星終水有龍游船艦壯
阿童之氣座空猴據歐刀伏逆景之誅掃瘴霧而無痕望江
雲而有喜於是琴書檢點束就輕裝波浪平安送將歸棹入
荒城而淚墮尋舊地於釣游槐市陰添龍爪槐
復生連洋舫繫斗室

在津逮之樓書雖杳友恭之堂記常存謂王陽甫所書石刻荊棘芟除

吾廬猶是護花奉養先意能承書云孝乎詩曰歸止其先生

之謂矣且夫金陵瓦解以來黔赤瘡痍而後王褒入魏終身

不還劉琨棄并百口都盡惟先生則鄉關重返骨肉無缺雖

人謀之不忒亦積善之餘慶馬糞王家世多長者牛牆鄭氏

賊拜通門作斯圖者固不獨戀東野之春暉抑且善保于公

之陰德也已霖自分襟袂常念履綦浪迹淮南從戎京口迨

洗兵而不用亦鼓枹以言旋握手重逢傾襟如舊訪兩家之

先澤請看苔碣猶留謂救生局碑記問南郭之遺祠只有桂花無恙

丙舍被燬爰流連夫鱗冊屬誣諉以駢辭自憐給札情深蓬

筆鮮如雲之氣聊誌世交誼厚松山留印雪之緣云爾松山在朱

痛門

徐棣友空帷鑒月圖序

徐君棣友以孝穆之才華抱安仁之悲悼紗窗日落容易黃昏環珮風搖依稀碧落集玉臺而成詠對金屋而傷神華髮驚秋漸改少年之色前身鍊魄怕逢三五之宵此空帷鑒月圖之所爲作也想夫玉鏡雙窺珠簾半卷額黃圓映眉綠纖纖攜手相隨天上之姮娥亦妒焚香私誓河邊之織女應聞而乃骨出飛龍淒涼藥店調翻別鵲懊惱琴心碧紗幪顧影自憐涼風起後玉闌干有誰共倚冷月來時翠羽明璫感前塵之如夢青天碧海乞仙藥其無靈嗚乎傷矣今者鵲魂久化蘭思猶纏逝水去而難回離天缺而可補鳴機續斷已成新婦之縑署字徵題不忘徵時之劍爰疏短引用誌夙緣三生尋鸞鳳之因君真情種七載憶鯨魚之況僕本恨人

送朱子期赴浙入學使者幕序

梅柳渡江春滿浙西之路芙蓉入幕羣空冀北之良使星一
過舊雨皆散有折角朱雲之胄尤盟心白日之交布幣陳庭
束裝就道羅之以禮溫石應聘而行飄然若仙李郭同舟而
去波生浦以初綠山到越而更青君真壯游我嗟小別溯平
生之送抱流水十年話後夜之相思明月千里詩逢名境料
多情淑之音酒入離筵別有辛酸之味爰於鶯燕迎年之日
製驪駒送遠之詞而先爲之序曰僕之初與子期遇也天災
逢元二之年稷下聚三千之客萍水暫合蘭交遂親鄉曲羈
身忘杜陵之避地主人好士縱鄉衍之談天癸丑避亂同客甘宅每當
月夕霜晨花初葉晚同與飛英之盛會眾驚慘綠之少年關
韻則銅鉢敲殘感時則唾壺擊碎攻拒樹兩家之敵推敲拜

一字之師豪氣未除憤初生以當虎名流小集驥附尾而許
蠅雖或中間屢遭世變豺狼橫噬勞燕分飛而瘴霧掃清無
愁塞宇浮雲遊倦終見還山幸聯季雅之鄰重結遠公之社
青箱家學各溯淵源白下名場分張旗鼓鄭虔官冷耐薄宦
而不辭

君需次
教職

元亮情長得奇文而共賞倡予和女合志同

方就令策馬將行無由並轡猶必隨龍角逐速化爲雲而況

秦穆慕奚下問五羊之價孔融薦禰不止一鶚之名

予名亦
在薦中

初何難攜手偕行縱情孤往立吳山之馬食嚴瀨之魚東海

觀濤西興間渡接會稽之竹箭訪台洞之桃花峭壁千尋窮

雁宕雲霞之勝澄泓一曲描鴛湖煙雨之圖兩浙山川收歸

眼底三年詩酒滌盡俗情比高李吹臺之遊了向禽名山之

願豈不快哉而乃事多乖忤心獨徬徨驚馬戀棧而不行鯤

鵬圖南而暫息緣慳碧幕閉門修卻聘之書交證丹忱臨別
託贈言之誼眼宜水洗心必衡平代推寒士隱情毋輕勒帛
善鑒先民風範莫致遺珠凡茲珍重之詞不盡纏綿之意行
矣自愛黯然銷魂留莫攀裾夢期識路倘遇雲山佳處折鯉
柬以見貽趁茲風雨良辰感雞鳴而不已請息眾響聽我長
歌歌曰殘雪悄兮春水生折楊柳兮贈君行望不見兮越王
城油幢兮畫戟躡上座兮諸侯客剖金篴兮量玉尺坐論文
兮行看山眼有福兮不得閒掉頭不顧兮予何煩華門兮圭
竇風穿兮雨漏每思君兮令人瘦鴻雁歸兮儻寄書紙如玉
兮字如珠上詠西湖兮下詠鑑湖越山青兮越水綠行不盡
兮浙江曲讀君詩兮景在目我雖不往兮心亦足亂曰一別
二載今日月如流新游雖樂兮莫忘舊游龍蟠鍾阜兮虎踞

石頭況有故人兮彷彿羊求覽徧雨浙兮盍早歸休歧予望之兮中心悠悠

送方子涵從使英俄序

欽惟我

國家極建星明球環地小

道隆柔遠事異鑿空互市極九萬里而猶賒通道開四千年所未有西轡東寄電掣綬而能通梯嶂航瀛火運機而最速天子念鯨波之永靖假龍節以周咨特命重臣遠臨絕域舉凡賓僚之選參佐之司皆得以自辟英材上名天府綠水紅蓮之幕從事多賢黃支烏弋之邦采風逾遠豈非遭際之極奇者哉今年冬十月劉芝田星使有歐洲之役假道竄陵欽子涵之才將延之以充記室人咸謂諸葛好靜少文倦遊未

必肯輕去其鄉終踰絕險雖感下交之節定修卻聘之書而
乃內斷於胸襟弗謀於家室受賁園之帛東泛海之裝仗忠
信以涉波濤馳文移以開瘴癘長年狎浪鷗鳥皆馴川若効
靈魚龍自舞行見展輪黃浦振舵香山掠西貢以張帆過新
坡而弭節峽通紅海城望巴黎英吉利之三島巋然俄羅斯
之兩都密邇天垂七政訝北斗之在南序素四時當寒宵而
反暑火山冰壑輿圖證其怪奇璇閣瓊臺居室闢其侈麗拓
尋常之眼界舒抑鬱之情懷其興豪其遊壯已且夫泰西通
使近且將十年矣握節者宣

神武之謨擴包荒之度敦槃修好允宜歃血以定從惟幄借
籌端賴攻心之有策以君之當仁不讓守正弗阿蘊藉法乎
仲舒簡要比於叔則必能機軸潛運弛張得宜飛書激於窮

荒府主倚爲左右手正衣冠於中國外夷視若神仙人吾知
時歷三年朶膺上考絕國專對漢廷應明詔之求油幢導前
唐帥由幕僚而得拭目以俟其在斯乎霖梓里栖蹤蓬廬息
影疏懶任其本性感慨萃於中年念舊雨之無多已晨星之
相似乃復天涯送遠歲暮傷離洛水溫生有力者奪之而去
河梁蘇子銷魂者別最難堪四方之壯志莫回卅載之交情
常憶拳拳不已默默何能乃擊如意而爲歌曰清霜冷兮寒
風遒山川肅兮天地秋君將行兮不可留海舟兮飛渡輪車
兮鐵路指倫敦兮越印度仗

天威以邁征兮百靈擁護蛟鰐窟兮窮探借前箸兮謀屢參
鷁薦一兮鶯遷三君去我兮九州外我思君兮大江南北載
光陰兮疾如矢待君隨星輶而返兮聽君海國之奇談

擬編續中西紀事敘例

江上蹇叟著中西紀事一書斷自庚申之役而止今又將四十年矣海水羣飛煙塵不息欲耀兵而金革凋敝欲絕使而玉關洞開市集蜚嘘布泉外溢學紛駭舌薪火自焚常深柰室之憂合補元亨之錄綜其始末有數大端慨自地合成球夫宗爲主倡言誘眾私鬪尋仇以譎傳譎市虎未嘗無迹惟辟止辟池魚每及無辜則有如天津四川諸教案其宜紀者一也西域邊平北夷要挾空城還我要地償伊漢代王烏已辱行人之節宋家寇準幸定瀛洲之盟則有如俄羅斯之歸伊犁其宜紀者二也象譯往來犬牙交錯凡茲屬國皆近邊陲雖蠻觸相爭勢可聽其自斃而豺狼縱搏欲將肆其無厭則有如日本滅琉球英夷滅緬甸其宜紀者三也番社掠舟

黑旗樹敵構將巨燹噴有煩言瘴雨蠻煙白甲自成一隊深
林密箐蒼頭特起新軍則有如日本侵臺灣法夷侵西貢其
宜紀者四也滬尾蹙兵馬江失險威揚鎮海捷報諒山張輔
才高方奏安南之績魏莊識遠已和漠北之戎則有如乙酉
年之撫法人其宜紀者五也倭眾憑強高麗積弱夙有并吞
之志反居保護之名平秀吉之取王城竟無失策于仲文之
臨平壤自魏罔功則有如甲午年之援朝鮮其宜紀者六也
遼東告警臺北戒嚴依輔無車舐糠及米鎬京實興王之地
不免戎侵珠崖本海外之區竟爲漢棄則有如乙未年之和
日本其宜紀者七也南北分疆膠州扼要旣遙制夫旅順亦
近接夫燕臺伺隙而來儼若吳人之窺楚探囊而獲誰從殺
谷以遮秦則有如戊戌年之款德人其宜紀者八也嗚呼時

局日新敵情愈幻殷鑒不遠杞憂無窮膏肓卧薪必自勵其壯志奉矢告廟乃克奏其殊勳惟在

朝廷一振興之而以此編爲座右之箴覆車之轍庶幾其有豸乎時光緒庚子夏四月

一前編蒐輯邸報及新聞紙之可據者是編仍依其例而爲時較近有身與其役言之鑿鑿亦不妨兼采焉雖觸犯忌諱如痛哭之賈生而借作勸懲爲罪言之杜牧其心實可諒也一日本近在東海離泰西甚遠而亦采入是編者蓋其國自明治以來改從西俗外觀有耀旣已羊質而虎皮舊習盡更何妨馬呼而牛應竝入歐羅巴之錄等諸巫來由之倫亦附庸於泰西云爾

一前編於殉難諸臣別爲一紀茲乃隨事敘入不復再見異

史記之作傳詳述生平如春秋之褒賢特書姓氏借省楮墨亦足表章

一康黨之倡邪謀以變法爲口實而事敗以後潛蹤海外徒木立信既欲效夫商君萃藪主逃乃競歸於殷紂梟獍之志未遂應鸛之逐彌嚴矢好音於懷西投譜人於有北牽連而及取殿茲編

張楚珩觀察濟上鴻泥圖序

楚珩同年望重富平家居建業馬君絳帳同聽誦弦謝氏烏衣夙陪游讌登冶城而遐想松篁匝青俯劍沼以鑑心荇藻縈碧足暫羈夫萬里晦遂養於十年旣而聞雲出山膏雨潤物旂揚冀北轂轉齊東參謀畫於油幢耀功名於繡斧贊皇訓武樓築籌邊文舉崇儒門題通德此其靖共夙夜肩鉅任

而不辭安能嘯傲林泉得雅人之深致而乃布政多閒宅心
彌泰屏除塵累澡雪精神玩積水之潭陟匯波之閣古洞深
而龍氣蟄長橋轉而鵲翼張湖泛大明舉杯邀月嶺尋千佛
躡屐穿雲巖石倒懸下米老笏袍之拜檻泉上出作莊生濠
濮之觀既藉以疏濬性靈固不徒流連光景也況夫盎盎古
懷超超元著過名區而憑弔遇故老以咨詢馬跡三周碧峯
華湧龜趺重負綠字苔埋靈窟修真闡丹經之訣崇祠表節
高鐵漢之名仰像設其依然草木亦知愛敬几履綦之所及
山川皆賴考稽至於一角潛亭半潭澄水窗虛納影瀑落傳
聲不翦茅茨圓如覆笠獨行葦岸閒亦垂竿非揚子之問奇
頻來載酒似蘇公之判事偶坐聽泉詩咏孔昭易占勿用甘
自居於大隱爰肇錫以嘉名其志宏其趣逸已今者瀝濱于

役江左假途羣瞻馬首以歡迎出示龍眠之妙筆圖成十二
全收濟上爪泥節近重三如展山陰禊帖感煙雲之過眼借
粉墨以傳神我當臥遊君尋墜夢雖日空桑留戀不忘三宿
之緣須知峴首登臨早作千秋之想焉爾時光緒丙午上巳
前一日

楊子穆觀察七十壽序

蓋聞壽星耀彩近臨亢角之閒涂月呈祥爰錫嘉平之號良
時吉日竺生偉人勝地名區難忘宦跡是以耆年召伯甘棠
之蔭常留晚節韓公黃菊之香不減歷艱難於壯歲享第祿
於遐齡元氣龐洪神明鞏固師貞協吉荷

寵錫者三箕福攸宜備範疇者九其惟我子穆大公祖乎公
宏農望族江右名家人傳詩禮之宗世繼簪纓之盛按圖騁

驥產自渥注奮翼驚鳳暫栖枳棘當其備員禹莢從事牢盆
督吏兵以緝私梟靖閭里而禽積猾求盜嗇夫之職悉聽指
揮箭張酒趙之倫漫矜游俠名聞淮北雖已著其事功局在
江南末由詳其梗概矣若夫專城作宰百里宣猷方眞州臨
泣之初正建業沈淪之日胥橋冶浦置域毘連青嶺赤眉去
來飄忽風聲鶴唳時傳意外之驚林木燕巢絕少獨完之屋
加以連營大帥以區脫視鳬沙在野遺黎田輸將於馬草公
機神默運識鑒獨高撫欲燼之疲氓弭無形之外患博望軍
藉以作導石壕吏不敢捉人練比戶之兵同心齊奮設臨江
之渡掬指無爭猛以濟寬搜荏苒而靖盜誠能感物率芻米
而犒師其智深其勇沈也旣而警罷瓜洲功宣棠邑兼緇瓦
梁之篆上權昇郡之符一條冰迭晉頭銜冠飄翠羽二千石

特邀心簡車駕朱輪記名

御展之閒愈感恩而思報遙領嚴城之任敢袖手以旁觀其
時賊勢漸衰兵威大振元戎架入肅細柳之軍容前敵親臨
踞雨花之山壘飛雲開之羽檄雖經環堞而營柰江上之米
船未得應期而至公囊韃上謁帷幄代籌爰於扼要之區權
設護商之局洲尋紗帽名偕龍袍玉帶而傳額仿關征入較
屋稅田租爲易衛估舟以上下鯨跋無驚權貨布之贏餘舛
飛盡聚下以通貿遷之路上以輸幕府之金焉然士馬雖已
飽騰而壘宇仍難恢復者則以奸民濟賊厥類實繁販戶輸
糧其源未絕也於是度中關之隘集下瀨之船巡察綦嚴往
來遂斷城臨玉壁非貉子所敢過關閉峭函防雞鳴之偷度
懸金購粟閒謀之計皆窮易子析骸寇盜之生日蹙遂乃下

招撫之令寬脅從之誅宣示

恩綸特開生路石頭城降旛待樹下蜀鎮堅壘先歸單騎莅
盟郭令自饒膽識全軍解甲張綱雅善拊循強著籍而弱歸
農有屯皆散遠畏威而近懷德無役不從由是月暈合閭雷
聲出地據龍蟠之高阜克虎踞之雄都司馬仙之下江南周
浚先爲揚牧韓總管之平陳國王韶實領蔣州一切勘定之
功半屬贊襄之略衣崇豸繡旗繪隼章不亦宜乎惟其稱耳
且夫大亂甫平者莫要於撫綏之術也殘黎久困者或失其
調劑之宜也公乃於蓬蒿滿路之時荆棘塞途之日阜通商
旅招集流亡講保甲之方清釐屋產協營田之使勸課農桑
曲奏迎神正地示之祀典役防聚眾折礦稅之邪謀凡善後
之諸條悉使君之首事實惠所在至今頌之厥後秩進提刑

封崇榮祿總巡防之任領督護之營鹽挾重貲利其轉運河
疏舊漬決盡沙淤解交鬪於兩軍信足以服悍將集救荒之
萬鎰誠足以格諸商雖馳驅徧歷於江淮而報最咸上於都
府下風遯聽造福良多茲當杖國稀齡懸弧令旦樹恆春而
蔥蒨花炫晝而鮮妍絳雪飛丹盡入長生之錄紫霞煥彩羣
擎永壽之杯某等夙荷帡幪感仁風之親被翹瞻榮蓋欣卿
月之非遙謹備述濟屯締構之難以推原視履吉祥之報事
皆出於聞見語不等於阿諛繼自今四國蕃宣再進生申之
頌趁此際九如增益先陳算亥之詞

鄭母朱太孺人六十壽序

蓋聞經緯星懸寶婺騰象躔之彩輶軒風采闕宮歌燕喜之
詩自來簪笏名門笄珈碩媛禮法齊於鍾郝賢明嫺於柳歐

德厚載以安貞靜叶犧爻之六畫身康強其逢吉福陳箕範
之九疇如鄭母朱太孺人者尤足述焉太孺人徽柔德粹婉
婉性成巧同薛氏之鍼神志慕班昭之女誠挾芳棠邑承清
望於紫陽依蔭萱闥締新姻於白下其歸我贈君西苓先生
也鳳簫聲和鴻案眉齊問高堂之起居議中饋之酒食慰翁
心以作苦不因出汲言勞傷姑性之未諳每爲嘗羹屈意自
計衣勤薄澣告歸慮聖善之憐因之袖作低垂起粟掩凍膚
之迹凡此慧心曲體無非內助所資忘家庭蕉萃之情勵夫
子桑蓬之志維時贈君方功深芸牖門植桃陰名滿高平望
隆建業庭盈羔雉聊酬服古之劬旦弋鴈鳧不忘夙興之戒
拘所謂相夫以禮率職無愆者也俄而鶴警傳聲鶯遷出谷
止柘塘之幽僻致梓里之敬恭族姓多貧無范氏義田之贍

鄉鄰久別從杜陵閒道而來太孺人則節日用之餘爲惠人之費經營衣履典質珥釵賓至如歸置比鄰莊之驛城園漸合盼深武惠之師何期蛾賊再張雅軍忽散居莫安於古瀨跡暫寄於蘇臺迨烽火之日深復貲財之盡竭倉黃出走蕩析離居鄧攸向江左而行衣囊自荷戴偃避湖南之亂子女分攜或寄累於陸莊或問途於花浦鑣揚吳道轍阻同歸太孺人俛俛海濱畏畏江澨懾赤氛之漸逼指白水以爲期星散何堪書附阻驛郵之路月圓屢望鏡飛悵樂府之詞幸贈君別道閒關中途邂逅坡名相見洋近零丁遂率合室以偕來因渡南溟而謀息脫茲坎險張十丈之鰲帆相彼甓湖作一枝之鷁寄實由天祐豈係人謀旣而亂定吳中歸從江外陶廬無恙馬帳重懸贈君以轉徙之艱當驚憂之定韓老成

病纏軟腳嵇叔夜術學養生慨二豎之難除經十年而更劇
太孺人服勤無懈敬事不衰暑寒藉其攝調出入資其扶掖
縱周南賢女難因茅苴以獨憂而謝氏諸郎爭茂芝蘭以娛
老長君光庭次君鏡潭季君子疇竝儉勤自勵忠實不欺筭
算能工精審計研之術醅醕並美羣推員賞之賢叔君超伯
貴舍蜚聲澤宮首選桂林對策終繼武於郗詵簽判就官且
暫羈夫蘇軾曹門望著知琮璋琛玘之迭興韓氏才多乃綜
絳纁維之競起兼之諸孫玉立快壻冰清喜翼燕之有人舍
飴遞弄顧乘龍之得偶坦腹何慚太孺人亦可以頤養多康
從容自適矣然猶劬勞不息瑣屑躬營督庭戶之掃除問米
鹽之價值魚羹鴈膳率介婦以烹調雞唱烏啼先一家而操
作至於仁心爲質陰德及人里閭被澤而相親僕媪聞聲而

皆喜思周推食窮蔭潛給以斗升心切禳災竊盜不追夫朕
篋惟其積之者厚葆厥和神所由報之者豐錫茲遐福也已
茲當律調鳳琯叶仲呂之和聲魄耀蟾圓值初盈之良夜筵
開周甲帆設良辰啟梅閣而陽回循蘭陔而日永窗通朱鳥
拂檐皆四照之花庭集青鸞繞砌悉恆春之樹霖誼叨末戚
久慕徵音適逢六秩之期敬效千齡之祝詞徵愛日頌述清
風彤管揚芬竊附中壘成書之例斑衣侑樂聊追老萊舞綵
之歡是爲序

丁禮民教授七十壽序

蓋聞師以道爲宗得民詳於周禮壽居福之首好德衍於箕
疇自來魁傑之資必獲耄期之報而況木公金母祐集介眉
梓子蘭孫歡承繞鄰家世本將軍傳易入儒林列傳之編老

更宜學舍乞言博

聖世作人之化尤人寰之盛事爲僭輩所希逢如我禮民先生者其生平誠足述焉先生毓靈京峴挺異鵬辰楊綰四齡辨聲於燈盞陸瓊八歲覆局於棋盤秉姿實倍於常童出語已驚其長老窮八索九邱之奧書讀等身擅千詩百賦之能文成在手時則紅羊邁劫青犢煽氛慘梓里之罹兵尋桃源以避地出險則單先斷軸篤學則董未窺園雖烽火屢驚不爲黃巾而輟講每室家粗定卽懸絳帳以尋師以故兵氣旋消斯文未泯經十年之養望遂一博而得盧蒙賞識於阮賢不爲白眼獲往來於鄭校許著青衿彩耀九苞吐鳳感子雲之夢牆窺數仞登龍入元禮之門人莫不高其才羨其遇焉夫使科名蔚起仕宦增榮傍日月以徐行騰雲霄而直上譽

競馳於輦轂舉不止於孝廉謝幼度以猶子之親追蹤安石
自敏中以諸昆之誼繼踵樂天豈不足表族望之高華見門
楣之鼎盛而乃襟懷淡遠志趣謙沖每抑抑以下人不皇皇
於進取懶向長安而走馬且官博士而得羊策莊助之干言
雖經待詔負鄭虔之三絕姑作廣文教澤風行羣仰菁莪之
樂育荒齋日照不嫌苜蓿之荒寒實堪驗名士之高情還書
生之本色也今夫裒多益寡惟算術最重夫九章割圓開方
雖通儒敢鄙爲小道先生生饒宿慧詣造至精倣羲和之測
天隨章亥以度地股四勾三通其旨積銖累寸探其原推步
難窮星宿之躔在望沈思所及雷霆之聲不聞得五雀六燕
之平重輕相埒悟下兔上雞之射加減易明學必統夫中西
理始貫於今古而況通河圖之數奪造化之權者又有圍棋

之一技焉先生善鎮神頭常爭先著洞出機藏機之妙邀逸
品名品之稱縱橫之用靡涯局非破荻劫殺之時最久看任
爛柯羊元保因以得官漫譏坐隱王積薪居然悟道是在專
心長夏能消領清簟疏簾之趣通宵不止與琴牀書榻爲緣
豈非游藝之餘功娛情之極致也哉且夫守一隅之地而不
觀壯麗於京師者其識陋也憚四牡之程而不窮險奇於邊
塞者其見小也先生四與計車平行廣野山循岱麓渡問齊
河覽雄縣之連橋買滹沱之危棹聞西山之鈴響路走明駝
瞻北閼之觚棱城臨翔鳳逮乎南旋以後無復西笑之心隨
星使以遊行溯江湖而上駛觀秋濤於湓浦玩夜月於洞庭
五溪之水倒流六詔之雲伊邇碧雞金馬信徼外之多神犵
草蠻花皆中原所未覩諺曰讀萬卷書行萬里路其先生之

謂矣今者建業涖官治城拓宅兼綰學堂之綬別加監督之
銜潭近烏龍寓廬是築洞開白鹿條教新頒經義治事之齋
分從安定格物致知之傳補自考亭雖以身歷

四朝年登大憲而精神強固步履從容眼觀細字之書晚來
猶爽口飲深杯之酒醉後逾溫耽道味以彌深葆天真而不
鑿祥自徵於壽世慶並洽於宜家德配虛孺人綱直表躬塞
淵成性弋雁諧其靜好芼魚致其潔誠志在勵勤緝葛覃之
什恩周逮下歌樛木之詩常遵內則之儀酒漿是議時懷大
家之誠井曰親操宜其散佩竝榮笏簪競集拜
丹綸於

天上森玉樹於階前律應月陽值早桂殘荷之候杯斟雲液
躋貞松壽柏之堂某等素叨至契久企芳徽分亥字以書祥

借王林而頌福心香效南豐之祝腰笛隨李委而來七十古
來稀惟杜甫偶留斷句八百齡伊始較彭篴尙屬沖年幸逢
吉月之辰良洗觴命酌敢廁眾賓之座末珥筆陳詞

司馬晴江八十壽序

夫溫公世德傳家已八百餘年彭祖遐齡計數僅一分以上
綿延譜牒矍鑠精神毓奇於鍾阜秦淮樹望於太山北斗若
我晴江先生者商顏綺季栗里淵明浙水宦遊品西湖之風
月秣陵歸隱臥北郭之烟雲靈光之殿巋然南極之星朗若
劉樊夫婦作平地之神仙孔李通家祝使君之壽考於今年
六月十一日先生八十攬揆之辰合簪裾之流輩奏霓羽之
新聲企梁孟之堂案齊眉舉斟狄康之酒爵侑手仇禮也然
使采王林之頌徒作諛詞添亥字之籌故爲廋語則雖工於

言說亦何與於生平故必推持身涉世之方以見錫福綏猷
之應二算不事朝廷所以禮高年三樂常存王公不敢矜富
貴準斯以斷請道其詳先生幼擅奇聰夙敦至性陸瓊覆棋
於入歲黃香溫席於九齡庭述異聞奉伯魚之獨對書細秘
畧讀中壘之校編當醺酒命冠之時正戰裁名場之日看方
刮目痛忽拊心思聖善於寒泉服勞莫遂阻扶搖於雲路發
軔無從加以青嶺傳烽紅羊罹劫感烏棲之靡定乘雞唱而
潛逃萍梗飄零盡是無家之客荆榛蕪塞每多失路之人其
時贈公方間道脫身棄家避賊入鄒嶧之穴幸免寇氛逆武
陵之津未逢漁父先生倉皇問訊辛苦尋親兩泣戒行星馳
冒險悲笳送響屢穿戊己之屯岐路追求自負零丁之帖幸
逢老父之無恙乃就樂土以安居貪莫食夫黍苗爰得我所

養須謀夫菽水善承親歡於是橐筆備書從戎負弩入仲寶
之蓮幕隨亞夫之柳營勇若虎彌拔戟自成一隊義如魯仲
飛書竟下連城露布頻聞冰銜疊署看山挂笏受辟不歸夫
間曹賁海爲鹽代耕特取其薄祿利通禺夾權領牢盆場地
賴以丈量竈丁資其軫恤救災黎於鴻羽濬河道以鳩工富
鄭公之振荒勸民出粟王陽明之講學爲士延師普惠澤於
四明報政成於三考官情淡矣歸興勃然遂乃檢束輕裝流
連古迹別賀監之道觀戀范氏之書樓鶴舫溯洞蠅牖密邇
守晏嬰之老屋倉山作鄰營季雅之新居青溪當戶猶復講
求技術檢點方書醫造十全盡通八法圍棋以消長日彈琴
而引薰風烟月多情酒最宜於微醉湖山遣興詩不費夫苦
吟淨几染毫時寫八分之隸小園抱甕親澆四季之花借導

引以養生鳥伸惟肖本潛藏而悟道龍性能馴固不獨待介
弟以友于愛猶予如已也舞綵含飴之頃樂天性以最真款
段下澤之遊稱善人而無忝已也作霖誼列葭莩味同蘭臭
長安聯騎曾采日下之舊聞建業締盟復聞客座之贅語會
開真率人盡耆英天關山高逢老僧而共話紫霞洞僻招羽
士以歡迎上柴丈人之樓黃葉滿地過盧莫愁之宅碧水平
湖几屬勝遊皆爲伴侶況茲令誕敢秘辭章排律吟成勉學
白元之調駢文製出再摹徐庾之篇聊揚長者之情芬用答
同人之誣謗所願樂易長壽和神當春憑下筆之于言博挾
尋之一笑十年以長則兄事不敢忘兕酌之恭一杯相屬當
君歌詩速和鶴飛之曲

可園文存卷七目錄

考

中國機器學家考

書後

書陶靖節閒情賦後

書何子青廣文行狀後

書錢辛楣宮詹補元史藝文志後

書李文清公題主說後

書司馬文正公年譜後

跋

國朝金陵詩徵跋

跋汪悔翁所書陳月江摺扇

先祖中書公遺札跋

竹居錄存跋

可園文存卷七

江甯陳作霖伯雨

考

中國機器學家考

粵自屯蒙既闢萬物肇興寄大造以鑪錘運兩儀以樞軸凡所以厚民生利日用者莫不由拙而巧由蠢而靈運會所趨本天地之自然亦事勢所必至也徒以質素渾堅古人所尙奇淫詭譎君子所懲故從風之車成湯破其製博物志結魯能爲飛車從風遠行湯時西風至吹其車至豫州湯破其車不以視民東風至乃復作車遣還厚水之械丈人惡其機莊子子貢過漢陰見一丈人方爲圃畦鑿隧而入井抱見功多後重前輕挈水若拙其名為槔圃者曰有機械者必有機事有機事者必有機心吾非不知羞而不爲也在昔名哲慮遠思深譬諸折衡剖斗之談非可施於今世矣閒

嘗瀏覽史冊博采異聞其制器尙象入乎機出乎機者歷代

不乏心局智鑰廓然大啟權輿所自何必歐洲三代以上蓋

有二聖焉曰黃帝

路史黃帝命史區浮箭爲泉孔壺爲漏以定中星又通鑑前編軒轅與蚩尤戰於涿

鹿之野蚩尤作大霧軍士昏迷軒轅爲指南車以示四方

曰周公

越裳重三譯而來獻自雉使者迷其歸路周公

錫以輶車五乘皆爲向南之制期年而返其國焉

南針漏箭於此胎胚聰明天亶餘

技爲之因時勢以制物宜也成周以來六人繼起曰偃師

周穆王西巡工人偃師謁王王曰若有何能偃師曰臣之所造能

倡者王驚視之趨步俯仰信人也技將終倡者胸其目而招

王之左右侍妾王大怒欲誅偃師偃師方破散倡者以示王

皆傳會草木膠漆白黑丹青之所爲王始悅而歎曰人之巧

力乃可與造曰范蠡雜說勾踐被吳見度人經以質范蠡蠡

化者同功乎曰范蠡作顯微神目鏡觀其宇體大而可譯又

范蠡兵法飛石重十二日墨翟成飛見韓非子曰公輸子

斤爲機發行二百步曰墨翟成飛見韓非子曰公輸子

魯班刻木爲鶴一飛七百里見述異記又公輸子曰雲氏女

爲母作車木人爲御機關一發其車遂行見墨子曰雲氏女

公輸子娶齊垠邪雲氏女亦神巧天授時齊魯旱蝗曰隱游

爲災雲作木爲數千令之自飛摩風迴翔擊蝗殆盡曰隱游

異苑魏安釐王觀翔鵠而樂之客有隱游者作木鵠以獻王
曰此有形無用者也曰臣請為王翔之乃取而騎焉翻然飛
去人行鳥飛手揮目送鏡耀星流兵家妙用藉空氣以為運

動也秦併六國寶生偉人始皇帝創物而新之秦咸陽宮中

燈下作蟠螭口銜燈燈然則鱗甲皆動又始皇營建家於麗

戎之山斬山鑿石下洞三泉以銅為槲旁行周迴三十餘里

奇器珍寶充滿其中令匠作機徐福乃因以推廣焉徐福為

始皇作自然之簾懸於宮門始皇抱文珠置郝蘊毒多傷藏

上其簾下去之則自捲不事鉤也故又名不鉤蘊毒多傷藏

珍白祕宮中簾帷舒卷隨意或疑為神仙之遊戲也西漢三

人則有陳平之智樂府雅錄傀偶子起於漢高祖平城之圍

平訪知閼氏妒忌造木偶婦人連機關舞埤閑兵強於三面陳

閼氏望見謂是生人慮法下目頓必納遂退軍丁緩之巧京西

羅記長安巧工丁緩作九層博山香爐為奇禽怪獸自能運轉亦

爐體常平又有九層臥香爐博山香爐為奇禽怪獸自能運轉亦

名被褥中香爐又製七輪扇連續七王莽之奢侈焉王莽傳

輪大皆徑丈一人運之滿堂生寒王莽之奢侈焉或言黃

帝建華蓋以祕帳四輪車駕六馬挽者皆呼登仙金瑤傀偶解圍

可園文存

卷七

二

華屋命駕輪扇風生爐香煙亞但見其術之變化也東漢之
世亦有三一人曰張衡太史令張衡作渾天儀於密室中以漏
動儀精鋼以鑄其器固徑八尺形似酒尊中有都柱旁行入
道施關發動外有八能首銜銅丸下設瞻蜍承之一龍或動則
隨其方面一龍吐火其機關巧制皆在尊中嘗一龍曰杜詩
發機而地不動咸怪其無徵後數日驛至地震隴西宮結
杜詩傳造水排注冶者作而殿以靈帝焉天祿蝦蟆轉木入
排以吹炭今激水鼓之
宮又作翻水太史占天循吏制器赫赫君王乃親細事固莫
湯鳥以酒道
不竭其心志也三國之交人才輩出在蜀則諸葛夫妻諸葛
亮傳亮軍出祁山以木牛運出斜谷以流馬運又作連弩鐵
矢長八寸一發十矢堅緻集武侯居隆中時客至命妻黃氏
具麪頤之麪至侯怪其速皆道之見數木人在魏則曹氏父
研麥運磨拜求其術復其製為木牛流馬云在魏則曹氏父
子魏志曹操發石車擊袁紹軍中呼霹靂車陸機要覽陳思
王有鵲尾構置之酒尊凡主欲勸者呼之尾則指其人
而杜預晉書杜預作人排新馬鈞馬鈞巧思絕世魏明帝令
章轉水灌澗又有相為後先焉政便轉運或事戰爭或助賓
卜人諸戲其焉

謙或益農耕又隨事以呈其能也兩晉制作則宣帝晉書宣
楷鉤橦發矢石雨桓玄桓玄傳性好田獵以體大不堪乘馬

下注謂衡車也桓玄乃作徘徊與施轉關令迴動無滯

實始終之其間若衡陽之區純晉陽秋衡陽區純作鼠市四

經四五鼠於中欲出鄴中之解飛陸左餘開四門門有一木人

門木人輻以推椎之鄴中之解飛陸左餘開四門門有一木人

十里磨麥一益州之鮑陋水經注益州刺史鮑陋為譙道福

石春米一石益州之鮑陋水經注益州刺史鮑陋為譙道福

有似援臂上施木天公直下至江中廬山之惠遠僧惠遠患山

定於水上立十二葉芙蓉因波為輪以類皆攻守互用兵獵相

資逐鼠魏穀刻漏定時固不獨舟指南代有指南舟鼓記里

晉書輿服志記里鼓車駕四形製如司南備典午之威儀也

其中有木人執槌向鼓行一里則打一槌齊祖沖之妙有機思

南北朝分畸人接跡在南則有祖沖之嘗造銅機敬器木牛

流馬千里船又於樂游苑陶宏景梁書陶宏景嘗造銅機敬器木牛

造水碓磨世祖親自臨視陶宏景梁書陶宏景嘗造銅機敬器木牛

而地不動以機楊光欣梁大同八年戊主楊光欣獻玉龍一

運之悉與天自楊光欣梁大同八年戊主楊光欣獻玉龍一

丁司之長一尺二寸高五寸腹容斗餘頸

亦空曲置水中令水滿倒之水

在北則有魏文帝

周書薛澄傳魏文帝

從口出聲如琴瑟水盡乃止

在

信都芳

通典北齊

造仙人鼓器水芝鼓器皆置清徵殿前

信都芳

田曹參軍

齊

形似舳而方滿則平溢則傾橙各爲頌獻

信都芳

田曹參軍

齊

信都芳爲輪扇二十四埋地中以測二十

沙門靈昭

太平廣

記北齊

四氣每爲一氣感則一氣自動與葭灰相應

沙門靈昭

太平廣

記北齊

沙門靈昭有巧思武成帝令於山亭造流船每至帝前引手

取杯船即自住上有木小兒撫掌與絲竹相應上飲不盡船

終不

去

去不類皆測天文驗地氣波流船水貯器又不獨簡文之紙

去

去

去

驚獨異志梁太清三年侯景圍臺

侯景之木

南史侯景爲

驢尖頭木驢攻

城矢石向戰場以闢智也隋煬性敏退朝每與嬪后對酒時

城

不

能

不能制向戰場以闢智也隋煬性敏退朝每與嬪后對酒時

逢興會輒命之至猶恨不能夜召於是命匠刻木偶人施機

關能坐起拜伏以像舊每在月下與相酣醉而爲歡笑大業

雜記元年六月築西苑內有神變月輔之以宇文愷有巧思

觀告以機成或起或滅若有神助帝彌悅焉耿詢馬書耿詢作

下觀風行殿上客侍衛數百人離合爲之耿詢馬書耿詢作

下

下

稱其妙又作渾天儀至杜寶大業拾遺記煬帝開敦學上杜

不假人力以水轉之至杜寶大業拾遺記煬帝開敦學上杜

不

不

已日台翠臣於曲水以觀水飾又造小朋子何稠造樓記何

長八尺七艘木人長二尺許乘此船以行酒何稠造樓記何

長

長

長八尺七艘木人長二尺許乘此船以行酒何稠造樓記何

長

長

長

長八尺七艘木人長二尺許乘此船以行酒何稠造樓記何

長

長

長

長八尺七艘木人長二尺許乘此船以行酒何稠造樓記何

長

長

長

長八尺七艘木人長二尺許乘此船以行酒何稠造樓記何

長

長

長

長八尺七艘木人長二尺許乘此船以行酒何稠造樓記何

長

長

長

車挽之可以升樓閣如行平地帝曰可名任意車而迎合彌工俾人時敬授之忱側

席思賢之意一變而為巡遊再變而為游戲此玩物所為喪

志也唐代藝士寔繁有徒若李光弼唐書李光弼傳擢民屋

之石所及輒若張仝唐書田悅傳臨洛將張仝以紙為

斃數十人若張仝風為高百餘丈為書達馬燧營若李

皋唐書李皋常運心思為戰艦挾若宣武廳子都武廳子都

尤勇悍其弩張一大機則十二小則運連弩發發車掉輪艦

機皆發用連珠火箭無遠不及則運連弩發發車掉輪艦

達軍書皆攻守之所需也若李清風太史李清風以雲臺侯

更請造渾天若僧一行唐書明皇詔僧一行與梁令瓚等更

黃道儀從之若僧一行唐書明皇詔僧一行與梁令瓚等更

及周天度數注水激輪令其若王方翼唐書王方翼為夏州

自轉每一晝夜而天運同若王方翼唐書王方翼為夏州

農方翼造人耕之法若開元從臣清異錄胡鼎施轉閣以交

施關鍵使人推之若開元從臣清異錄胡鼎施轉閣以交

與重不數斤相傳明皇行幸頻多從臣或待詔野頓屬駕登

山不能跋立欲息則無以寄身遂創意為此當時稱逍遙座

則窺靈臺占黃極代牛耕息人力皆日用之所急也至於韓

志和之覓龍牀杜陽雜編唐飛龍衛士韓志和雕踏牀高數

鼈爪甲俱動又廣記志和雕木為李元嘉之銅鶴尊載唐韓

鷺鶴置機楔於腹中發之則飛

王元嘉有一銅鶴尊背上注酒

則一足倚滿則正不滿意則危側

則野僉載洛州殷文亮曾為縣令性巧刻木為人酌酒行觴

又作妓女唱歌吹笙皆能應節將作大匠楊務廉有巧思於

中錢滿關鍵忽發自然作聲云布施王琚高駢之木獼木鶴

朝野僉載郴州王琚刻木獼沈水取魚引首而出蓋國口中

安餌為轉關以石縋之則沈魚取餌關即發口合則銜魚石

發則浮出廣陵妖亂志高駢刻木為鶴中設以及十二辰車

機樞人或逼之奮然飛動駢嘗羽服跨之以及十二辰車

朝野僉載則天時海州進一匠造十二辰車同轅仙音燭清

正南則午門開馬頭人出四方回轉不爽亮燈仙音燭清

錄同昌公主薨帝傷悼不已以仙音燭賜安國寺冀追冥福

其狀如高層露臺雜寶為之花鳥皆令曉臺上安燭既燃點

則玲瓏者皆動丁木球之類宦游紀聞雪峯寺僧義存於唐

當清妙燭盡響絕木球之類咸通中開山創寺乾符賜號真

覺禪師寺有一木球受真覺不過恣奢靡供玩好固卑卑不

足道矣宋代多材相如蘇易簡太平興國中蘇易簡為學士

章得象之稽古春清紀聞古劍蟪蛄章申公碩滴也每注水
水入硯已而復將如虞允文紹興辛巳逆亮至江北掠民船
吐腹皆則止旗舉則出伺其半渡卓旗於山人在舟中踏車以
山後令口旗舉則出伺其半渡卓旗於山人在舟中踏車以
行船但見船行而不見人虜以為紙船也舟中忽發一霹靂
礮蓋以紙為之而實以石灰硫磺礮自空而下墜水中硫磺
得海水而火自水躍出其聲如雷遂壓虜舟人馬皆溺見楊萬
里海賦序王彥恢之用兵紹興二年無為軍守臣王彥恢每輪
入檣四旋以及思訓司天宋太平興國四年司天監生張
幹儀於禁中日月行度民瞻刻漏宋曾民瞻為南呂尉以晷
渾儀於禁中日月行度民瞻刻漏宋曾民瞻為南呂尉以晷
成於自然不假人力民瞻刻漏宋曾民瞻為南呂尉以晷
有兩木偶左者晝司刻夜司點則擊板差遂改造其法箭旁
以告右者晝司刻夜司點則擊板差遂改造其法箭旁
以金銀為之飲不得其法則鳴鉦以告鄭獬傳觥記注蟹杯
罄鉗其唇必盡乃脫其製甚巧皆能考藝器運匠心而杭州
之火寸輟耕錄杭人削松木為小片銻疏磧南越之翻車越
雜記昌化以北凡百餘里兩岸之間巨石相洞庭之戰艦宋
拒水端怒流居民多以樹木障水為翻車相
洞庭賊楊太四輪不得擅美於今矣元尙工匠殫心制造世
汲水船行如飛

祖則爲克敵之謀而捷書屢報宋軍拒金多倚神臂弓爲利
得其機輪仿製也元世祖滅宋得其式曾順帝則爲娛情之
具而海內虛耗元順帝自制宮漏約高六七尺爲木樞藏壺
王女捧時刻籌時至輒浮水上櫃上設西方三聖殿一懸
鐘一懸鉦夜則神人自能按更而擊櫃之東西有日月官飛
仙六人立宮前遇子午時自能爲治爲亂亦各從其所好也
耦進達三聖殿復退立如前
明代禦夷漸重火器曾銃啟其端兵略纂聞曾銃在邊置慢
綫至一二時纔發又製地雷穴地丈許春藥於中以石滿覆
伏火於上可以經月過者驟燃則火墜藥發石飛役人敵驚
以爲浙江戴某萬厯時浙江戴某有巧思嘗造一鳥銃形若
神機有二相銜如牝牡振一機則火藥鉛太自落筒中第二
機隨之並動石激火出而銃發矣計二十八發火葉錦火乃
盡擬獻於軍營夜夢神呵曰上帝好生如及陳端之理其緒
使此器流布民生無嘯類矣乃罷而止
南略守備陳端之居江陰其子能造軍器有木礮火毬火磚
等件木礮者長二尺五寸廣數寸置藥於中狀如銀鞘敵攻
以卽擲出敵見而異之羣相金鐵相激雷電爭鳴近日鎗礮
爭奪忽內機發反射皆死

之先聲也而

國朝黃履莊之自行車燥溼針

虞初新志黃履莊少聰穎時出新意作諸技巧有雙輪小

車一輛長三尺許可坐一人不煩推挽能自行行佳以手挽

軸旁曲柄則復行又作驗燥溼器內有一針燥則左旋溼則

右旋並可某比部之木狗木雞續新齊諧葉文麟言在京師

惡犬咆哮而出葉大怖主人隨出喝之犬臥不動主人視客

笑吃吃問何故曰此木犬也中設機關遂能吠走葉不信主

人更出一雞黃羽絳冠仰頸江永之木牛木驢寄話筒江秀

報曉披毛視之亦木所爲江永之木牛木驢寄話筒江秀

才永字慎修能製奇器家中耕田悉用木牛行城外騎一木

驢不食不鳴人以爲妖笑曰此武侯成法非妖也又置一竹

筒中以玻璃爲蓋以筒開之向筒話畢即閉皆能自出機軸

傳千里聞筒而耳其音宛在不啻面談也

爲創而不爲因非所謂用志不紛乃疑於神者乎要之人同

此心心同此理中人不必要遜於西西人不必要勝於中閭頗方

趾之倫萬物之靈在是特視其專心與否耳語曰天子失官

學在四夷絕而續之是在守先待後之君子

書後

書陶靖節閒情賦後

夫平子卑栖定情以作伯喈遠讀靜情乃成類皆繫念靈修
自傷不遇雖託詞於荃蕙非寄慨於黍禾惟彼泉明生於江
左承長沙之家世爲建威之參軍令彭澤以代耕拜督郵而
辭職恥事二姓有類夷齊獨往一邱無慚沮溺先生柳在作
傳而隱其名漁父桃開紀事而幻其境以文爲戲其情則傷
是賦寓言亦猶此志借美人以寫意居然屈子離騷懷故國
而不忘尙記義熙甲子不求知我祇解愛君較陳思解誤感
甄同耀芳華之飾何梁嗣心忘戀晉指爲白璧之瑕披牘具
存辨誣宜亟竿譬而喻匪同月露之詞好色不淫適合風人
之旨焉爾

書何子青廣文行狀後

君之世父祥垣都轉與予從祖觀察公同舉鄉試而予又與君同補博士弟子員兩家世相好也然君隨宦於外久後又乘鐸宿遷未得數數見光緒庚辰春計偕北上與君同海船行君修髯垂腹非復少年風采矣其時颶風大作予與同舟者皆不能興而君坐起飲啖如常竊嘆君精力過人其剛毅不屈之性亦秉賦使然耳既至京師又同寓會邸對宇而居見君日閉戶作家書常有咨嗟聲心竊怪之一日者予謁今少司寇夏伯音丈還君卒然問曰夏丈文徵已刊竣乎抑未也文徵者鄉先生之制藝夏丈將彙輯其稿以傳者也予答以夏丈事甚劇校勘無助者告成尙需時日君因歷述在宿遷被誣事怒氣盈涌不可遏既而嘆曰吾未了之事祇先君

遺稿未傳負辜大矣予訝其言過當急以他語亂之然知其蓄死志視中不中爲決也乃報罷後則市土物檢歸裝如諸人心竊幾其可以不死而君竟卒死然後知閉戶所作之書卽告訣之書也京師所市之物皆償其宿諾之物也不死於京師而死於海者不肯以遺軀累友朋也君之處死可謂從容堅定矣予讀君行狀旣畢謹書其所親見者以諗君之嗣子焉

書錢辛楣宮詹補元史藝文志後

偉矣哉宮詹是志之補有四善焉一曰存經學箋疏之作逮宋而中輟然深甯貴與獨稱博洽至吳草廬而著述愈富浸漫乎超唐祖漢無愧儒宗矣此其不可不志者也二曰衍理學自晦翁云亡朱門四先生承其緒而許魯齋遂集大成由

是派別支分各有著錄鄒魯盛業賴以不祧此又不可不志者也三曰開算學元代幅員最大回疆印度均在域中郭守敬輩翩然來儀隸靈臺之職掌天文水利專門名家疇人之書因以日出此尤不可不志者也四曰重詞章虞伯生爲東南人文之冠揭黃輩輔翼其閒風格高舉才華麗則卽隆戴諸詩皆足上追風雅而詞曲更爲一代絕技此亦不可不志者也噫自至元以迄至正不過百年而典籍之貽汗牛充棟收藏家多有其書苟非宮詹蒐羅之廣採掇之勤亦安能成此鉅觀爲元史拾遺之諫臣規過之諍友也哉

書李文清公題主說後

李文清公作題主說以世俗題主皆虛主字一點臨時請顯者點之近於通典所載唐宋題主墨書訖以光泰重模乃天

子之禮非士大夫所宜用且謂朱點爲以上行下施於脾票告諭者不可以爲敬甚哉理學家之好逞異說而不詳審禮之所由變也夫光泰重模卽非天子之禮亦與加點無涉不必強爲附會至脾票告諭之朱點乃點之於字外非借點以成字又豈得援以爲詞耶竊嘗思之世俗相沿之禮縱極不可解亦必有所緣起苟不能深究其故而漫加疵議則歧之中又生歧而制禮之初心遂滅沒而不可考惟精通禮意之儒第就世俗之所行顧名思義援古證今未有不渙然冰釋者也謹按品官喪禮

會典所載與世俗所稱皆曰題主亦謂題其官銜姓氏耳今乃僅加一點者意者遭喪之家將請顯者題主以爲榮或因達官者儒年高日暗不敢勞其全題於是預爲繕寫而虛主

字一點待其秉筆借存請題之意況主字古文本作、則題此一點謂之題主於名亦未爲謬其點必用朱者古者器新成則釁如寶鏤鐘鼓之屬無不以血塗之小戴禮雜記疏宗廟初成殺牲塗血以釁尊而神之也又周官禮太祝注血祭曰釁是皆在廟之禮主乃廟中之最尊者新成當血祭以神之而世俗喪禮率溺於浮屠法必有持戒之輩謂血爲不潔用朱代之遂因仍而不改而一切疑神想象諸儀猶參以祭奠之忱無不極其誠敬欲通肸鬻於朱點中其卽古之所謂釁與是以近時題主每有人子自刺血以點之頗得釁器之遺意惟不用牲血而欲以己之生氣存其神靈雖所傷無多不得譏爲毀體然窮極流弊恐有戕肢幹殘肌膚以爲孝者是又過於情者之所爲仍不得乎禮之中故不可以通行也

然則世俗所通行者果不悖於禮乎曰作木主所以奉鬼神也僅加點所以優賓客也用朱筆所以尊重器也一舉而三善備非亦亡於禮者之禮乎彼李文清公之說固不必因其爲理學名臣而曲徇之矣

書司馬文正公年譜後

右司馬文正公年譜四卷無錫顧復初祭酒所編次也司馬晴江先生將重槩之屬作霖是正校既畢因喟然而嘆曰自古有國家者銳意富強而變法不善其旣亂曷可勝言耶譬之於醫人當中年以後精力漸衰營衛不充閒作寒熱此氣虛而外感乘之也固其表實其裏損過補偏便可無事乃不察病之所起與病之所極或主消導或主攻伐下之則陰竭汗之則陽亡日易一方競爲嘗試卒之疾未能去復中藥餌

之毒而元氣乃大虧雖有良醫亦無如何惟束手浩歎而已
司馬文正公固宋之扁鵲倉公也其始不見信於病家及信
矣而病已不可爲譜之所載歷歷堪稽千載以下猶爲扼腕
吁言變法者可以鑒矣然則晴江先生之彙行是編豈惟是
述祖德云爾哉蓋今日之有心人也時光緒二十三年春二
月

跋

國朝金陵詩徵跋

吾鄉朱述之太守宏博淵懿留情古典平生撰箸極富而金
陵詩徵一書尤有功於桑梓其時助蒐采者吳癡仙明經之
力爲多甘實菴部郎王善之孝廉朱金牧茂才亦與聞焉蓋
經營於道光壬辰斷手於咸豐辛酉三十年閒殫心竭慮成

此鉅觀鳴平盛已令子崇嶧徵君寶愛遺書不敢失隊而又
欲公諸同好以廣流傳霖因得受而讀之嗣修府縣二志資
爲考證左右逢原然後嘆是書之足備掌故也第篇帙浩繁
未能驟付剞劂丹徒趙季枚內翰秉鐸郡齋好尙風雅謂名
山所藏必存副墨倡議影錄慨助鈔資而全椒薛慰農山長
吳縣吳子和廣文與同里石東山方伯楊竹村觀察孫澂之
梅少葦湯沐之胡煦齋四太守甘劍侯秦伯虞兩孝廉翁鐵
梅茂才共成之於是是書乃無虞殘蝕矣光緒乙酉之春金
壇馮夢花孝廉有彭城之役同人餞諸冶城之竹居合肥張
楚珩茂才與鐵梅論及是書欲先槩

國朝諸冊以爲嚆矢首發囊橐而徵募以集其事與議者凡
十二人夢花楚珩劍侯伯虞鐵梅而外則爲上元顧子朋田

撰異江甯方子涵鄧熙之江浦侯杏樓溧水朱豫生以賤子之庸鄙亦得濫廁其列曾未數月捐有成數徵君遂發篋陳書分部讐校歸遺民於勝朝之末推寄籍於寓賢之中閭秀方外二卷經亂遺失其補未備者仍之道光以後諸賢並世而生其取甚略者亦仍之繼述先志不敢妄爲增損蓋其慎也點勘未畢老病日侵丙戌夏初召霖而屬之曰是書之始末惟子知之最詳書後之辭將於子是望霖悚然以不文辭徵君曰予之意非欲其文欲其質耳助蒐采者若而人捐鈔貲者若而人議槩木者若而人皆須記其姓名以事存人猶是先人志也若以古文之法繩之豈能瑣屑若是哉乃語未十日而徵君捐館霖雖自慙其不文而有所不敢辭亦不忍辭爰本徵君之意而爲之跋時光緒十二年夏六月

跋汪悔翁所書陳月江摺扇

陳月江茂才槎汪悔翁先生之弟子而悔翁實受業於乃祖松雲明經師友淵源孔曾之誼也月江事悔翁謹與人交不解作世俗周旋悔翁嘗稱之曰月江得吾拙夫悔翁以東南一老名動卿相品學文章非曹輩所能及其所謂拙者對世俗之佻巧而言也不忤不求知止知足霖之仰止悔翁者在此而月江獨得其傳此月江之所以足重與霖交月江有年矣會其以悔翁所書之簞屬爲補白因取悔翁之許月江者而繹之不知有當於悔翁之意否也

先祖中書公遺札跋

予家經癸丑之難前人手澤蕩然無存嗣於宣城伍大令慶祥處得先祖中書公課徒時所錄文稿一冊霖攜至鳳陽

因避撚氛失去吾父常以爲憾江南亂定高寤夏明經煥勳
以先曾祖鄉賢公所臨文賦六幘見貽吾父謂爲百朋之
錫而中書公墨蹟終無由復覩焉光緒乙未歲從子詒慶
奉祖母自晉歸爲檢故紙堆中獲家書十數頁有完好者有
殘缺者皆中書公寄弟觀察公之箋札也其詞意殷肫絕
無浮飾百年老物再見於斯想有呵護之者俾我子孫得瞻
遺翰稍釋前日拋棄文稿之憾惜吾父不及見矣嗚呼光緒
二十二年孫作霖敬跋

竹居錄存跋

夫同人續集巢民菟裘隨園雜文簡齋甄錄流風所播衍於
竹居精廬落成謠詠閒作坐篴獨嘯抗希晉賢折梅遠訊時
逢隴使投贈旣夥彙爲斯編雜誦一周因之三歎治城遐想

王謝所同西園柔翰應劉繼逝煙雲易幻日月不居爪印泥
鴻夢境蕉鹿撫今追昔觸緒興懷袞袞諸公牛腰卷富眇眇
小子驥尾名彭竿亦濫齊風無譏卽自慚形穢默數心交樂
奏眾仙名排千佛雖涓城發唱猶有舊人而秋墳聞詩半化
異物聊下轉語借以解嘲一壑能專嘉茲山水千秋不朽壽
在文章質之主人當亦以知言許我也

可園文存卷八目錄

碑

金陵新建曾文正公祠碑

記

可園記

陶靖節先生附祀諸葛武侯祠記

盜麓祭詩記

莫愁湖新建曾公閣記

鍾山書院藏書記

食貨軒記

濠堂記

柏陰九友圖記

新甯工藝廠記

可園文存卷八

江甯陳作霖伯雨

碑

金陵新建曾文正公祠碑

蓋聞召伯佐周芟舍愛甘棠之樹武侯相漢錦官留古柏之祠
自來耆艾重臣魁梧碩輔勲高社稷澤被生民奠中外以
皆安功名最盛就軺車之所歷謳詠偏多沒世不忘有勞則
祀而況中興景運衡嶽英靈竺生異人蔚爲名世以唐家之
裴度作江左之夷吾鍾阜石城是臥治之都省吳頭楚尾悉
手定之山河應台輔之一星垣環太紫促修齡於百歲藥乏
還丹四海同悲九重永眷有不建表忠之觀題旌德之碑者
乎公鄴國名宗湘江望族起家甲第供職詞垣受特達於

主知躋崇階於卿貳伏青蒲以獻議力可回天持碧筭以衡
文識能相士當雍容於侍從猶歌詠夫承平泊乎軍事日興
詔書敦迫起晉侯之墨經募李瑒之鄉兵計畫萬全夷險一
節惟誠動物親僕射如父兄以人事君拔偏裨爲將帥功幸
成於百戰位乃冠於羣僚凡其鄂岳治兵豫章垂翅嚴裝赴
蜀間道援杭以及桐皖之經營徽祁之堅忍策由素定績不
勝書然而郭令收東都大勳始集韋皋薨西蜀遺愛常留則
惟江表之謨猷尤見生平之忠藎敢稽舊事聊備前聞今夫
韓禽戰於新林陳原弱國曹彬渡於采石唐本孱王摧朽者
力易施乘時者功自倍縱能有立曾何足云若我公作督之
年正逆賊橫行之日煙塵擾攘羽檄縱橫嚴虎入吳董昌據
越度支束手財賦無以贍軍土壤錯牙英雄幾難用武而公

乃運機於掌成算在胸辭四省兼制之名建三道進攻之策
開幕府以坐鎮界介弟以重權統百勝之師臨江橫槊據上
游之勢高屋建瓴輦軍實而轉般蕭何漕巴中之粟揮樓船
而下瀨王濬入建業之城都會既收旌麾戾止壺漿簞食遺
民夾道而歡呼帕首犇刀大將屬鞭而遠迓於以見恩威之
洽體統之崇焉爾乃招集流亡蠲除征賦來商旅以足用減
徭賦以安人襲軌里之規戶皆保甲正鹽官之法竈鮮窮丁
本計則首勸農桑著籍無久荒之土仁政則必先惇獨感恩
多恤緯之嫠離亂之酷如忘休養之情漸遂而且崇文教以
消武猛本經術以爲吏師疏請制科籲俊闢門之盛課增書
院經義治事之齋激百世之懦頑范史爲忠義立傳敦一時
之節儉楊綰使京兆減騶苦心迴斡於無形民俗漸摩於不

覽至於流連賓宴獎借英髦攷古證金石之文適情玩湖山之
之美開溫公之書局典籍駢羅敲謝傳之棋枰襟懷自遠輕
裘叔子侍鈴閣不過數人坐嘯成公任功曹亦無廢事固風
人之雅致亦政務之多閒也然使免冑而來已孚民望伐柯
不遠遽悵公歸則泰山出雲雖或四方之徧潤福星度世究
非一路所能私而乃誓齊魯之師移畿疆之任首途才北返
旆旋南河內盜平寇恂不妨久借兩川節好嚴公竟得三持
朝廷倚爲社稷臣南人奉爲慈父母十年生聚千里乂安其
情親其澤厚已昊天不弔哲人其萎馳奏上聞

綸音下逮備極飾終之典用酬報國之忠列爵之封旣優於
馮鄧功臣之廟許媿夫徐常則有舊屬官僚合城士庶卜求
吉壤近在城西分清涼之一支實四松之故址遠吞江白仰

挹山青竹樹迴環岡巒起伏北瞻廢苑鄭監門留拂之基東
俯曲池顏魯公放生之所巖廊幽邃足稱靈居棟宇高驤條
成傑構興工於某年月日落成於某年月日以紀

君恩以紓民念禮也嗚呼地原絕勝可以栖神魂而有知猶
應戀此龍蟠虎踞旣已表大功之坊風馬雲車尙冀降吾民
之福爰就禱祠之意以成迎送之詞詞曰

神之來兮遲遲揚翠旌兮朱旗侍從列兮森威儀登高城兮
遙望雨花山兮雄保障地夷平兮天清曠浩長江兮湯湯樓
船十斛兮排風檣張水嬉兮鳬鴈翔揆文兮奮武化險途兮
成樂土千里行兮無所阻神有功德兮杳難忘薦俎豆兮陳
邊房願神駐此兮享一觴

神之去兮雲景移靈風颯兮送將歸望不見兮中心悲深山

今窮谷懼萑苻兮潛伏肆強梗兮誰爲服落日兮滄溟海氣
上兮霧冥冥蛟龍變幻兮波濤腥履巖壘兮望封域懷隱憂
兮心惻惻欲廓清兮仗神力風和兮雨甘憂樂同兮功德覃
願神無忘兮江南

記

可園記

可園非園也予強名以爲園也地縱橫無半畝而堂寢庖潤
間之築園者當不若是然高者山深者塢邃者徑實斯園之
所自具雖欲不園之不可也於是卽聽事之側啟門而入顏
其堂曰於斯爲應接賓僚之所取先世舊名以名之食德之
意也稍進爲養鰥軒家君及予兄弟讀書之齋也雜花絡
壁芳草侵階雖未及園有園意焉再進則凝暉室前梅後蕉

冬夏皆宜南啟明窗北開洞戶冬晝日煥暑宵月涼蓋吾

父母之所燕息也室之後有廊砌下徧蒔長春四時皆花取
室之名以名之曰凝暉廊廊之窮有複室曰徵文考獻之室
予修志時嘗居之北牖洞達清風徐來院中有榴一株舊植
之所屢存者又曰瑞花館因己卯之歲麗春並蒂同心而錫
此號也至此而園在目矣自凝暉廊東出歷籬門一重梅
花夾道瘦枝冷豔最宜雪月是爲寒香塢稍折而北過籬門
數步至叢碧徑梧竹交陰寥天皆綠夏日不到三伏如秋由
是路漸曲地漸隆就山勢之坡陀歷級而上則望蔣墩在焉
萬屋鱗次鍾山如龍朝暉夕陰氣象千變園之最高處也從
墩下稍南有亭翼然而對西嶺石頭諸山拱列几案延清之
名所由來也過岡而東是爲蔬圃青黃歷落交錯若繡芳香

媚舌味勝肥甘而園之地至此盡矣是園也在人視之鮮不以爲陋者而予上奉親歡旁招弟妹諸雛跳躑婆娑其閒覺梓澤平泉雖極華靡不若予園之有真趣也乃作可園八詠詩暇輒歌之以自娛焉

陶靖節先生附祀諸葛武侯祠記

夫天地不朽節義以名賢豪所經山川增重由來尙矣至於管晏合傳生非一時夷惠並聖感均百世則又泯履綦之異證心性之同焉靖節先生以長沙之曾孫遭金行之否運巍巍閭閻無殊琅邪故家撥撥風塵何異桓靈末造屬在隆安之季始遊建業之都斯時也上游靈寶久懷逆卓之心草澤寄奴未起阿瞞之義武陵王遵班崇叔父營領鎮軍王牒承華親賢望重周廬作率宿衛勳高先生適以英年首膺徵辟

藩邸應聘參軍莅官束帛邱園雖非三顧之亟袴褶幕府已
備一命之榮使王而扶危定傾夷凶戡亂乘攝萬機之鉅任
立左將軍之殊功經略荆襄盤龍之隙不作指揮梁益黃虎
之敗無聞先生帷幄從容巾幘瀟灑匡扶帝胄光啟中興豈
不治魚水之歡結雲龍之契而乃屏王承制大柄假人逆知
鼎祚之終微無復宗英之可輔不遇感士閒情思君故當義
熙之初元復向秣陵而行役覽山川之如昔傷人事之日非
寄慨壑舟勵操霜柏索靖銅駝之嘆荊棘荒涼張掖石馬之
文波濤滅沒若彼樓桑布蔭火井重然豈可得乎必無幸已
由是絕迹修門栖蹤栗里建威暫出彭澤旋歸弦歌謀三徑
之資田園畢一生之事柴桑地僻卽是南陽古史咏成如吟
梁父幽居澹泊常守布衣之貞詩格沖夷直配建安之作吳

幼清謂先生欲爲漢相孔明而無其資詢知言哉蓋武侯之
生平由隱而仕先生之出處未行卽藏漢晉完人殊塗一致
而在庚子乙巳之際正桓傾劉奮之交先生辛苦入都藉圖
事會馳驅許國未已壯心其有隆中遇主之望乎故以先生
附祀武侯爲最宜而祠諸金陵之靈應觀尤宜之宜者也嗟
嗟志抗羲皇目無曹董淵臥龍而偶出坡駐馬其差同鍾阜
石城不改東南形勝筍輿葛帔且摹典午衣冠乃作樂神之
詩俾歌以侑先生其辭曰龍蟠虎踞帝王之都金陵建國實
始孫吳晉氏東遷襲其規制桓桓長沙經綸名世明德之後
乃有達人高懷遠韻超軼羣倫隆安以還權臣竊柄翼戴衰
朝爰求同姓武陵開府維邦之楨參軍應聘委質策名綱昔
炎劉昭烈倡義諸葛輔之上邕有寄先生秉志非甘隱淪風

雲倘遇追步宗臣奈何名藩孱弱不振受制於人任慙重鎮
乃辭建業長嘯拂衣建威彭澤暫出仍歸宋業日隆屢徵不
起飲酒高吟以沒餘齒詩題甲子旨趣堪尋不忘故國武侯
之心丞相祠堂西山高峙合志同方先生附祀龍潛勿用下
有深潭扶疏繞屋碧柳粼粼薦菊酌泉神其來也前忠後節
雲車風馬

葢麓祭詩記

維光緒十三年歲在彊圉大淵獻辜月戊寅日金陵詩徵栞
事告竣翁子鐵梅邀集同志祭歷代詩人於葢麓之薛廬禮
畢而燕無算爵行甚盛會也時則池冰尙薄山木盡童竹搖
碧以玲瓏梅染黃而細碎啟西頭之精舍佳勝爲多修北面
之上儀式憑斯在冠裳綵繚聚名士於江淮槃敦縱橫聯新

交於僑札記稱展事易筮盍哉壇坫風流罕其匹已夫豪華
弊俗佳麗少年拾王謝之唾餘踵齊梁之積習恣情絲竹溺
志壺樽曲宴迷香浪擲黃金於虛牝閒情作賦終爲白璧之
微瑕而茲獨曲作迎神文資會友仿傳芭於楚些續雅集於
鄰園發潛德之幽光昌黎志遠循歲除之祀典賈島名沿百
罰不辭觥政倍嚴於梓澤羣賢畢至畫圖何減於蘭亭合今
古以證盟爲湖山而生色其在是與顧嘗聞之發端勇者臨
事怯持論易者歲事難是役也三年有成千金猝辦用泉流
而幾竭志山立而莫移太沖多才任譏爲信父子晉鏤板遂
行於通都一洗南人罷懦之羞力矯中道因循之失牛耳是
執舍翁子其誰屬哉抑吾尤有感者龍潭一曲桑根所居自
河汾撤瑟以還多羊曇樞門之痛今者主酬賓唱雖尋白社

以言歡室邇人遐不免黃壚之歎逝惟祝文章司命風月主人瞻望故廬得聞韻事或與鳳逸龍蟠之士驂鸞控鶴而來重尋桃李之陰同饗荔蕉之薦則西州勝處松菴久卜芳鄰他日寓公藤館定參坐席焉爾與會者凡三十五人其爲名德之後世濟其美或宦或遊來居我里則有若邵陽魏仲子桂岡縣鄭太夷李晉廬江吳鑑泉學廉長洲朱仲我孔彰山陽魯子剛楨大府之客沆瀣相投從事書局賓禮優游則有若懷甯馬鍾山徵麟寶應成漱泉兆麀儀徵劉誠甫顯曾金壇馮壽同圻居涂之陽作客江鄉則有若滁州唐友蘭芝榮大啟薛圃作我地主則有若全椒薛聖木葆樞至於吾鄉俊彥有耆有髦或望高北斗或名冠詞曹以及閭修之士英辭令韶則有若長白常少村承恩似村承厚上元張紫珊兆鍾

周柳潭嘉樸金仍珠還江甯楊西華長年盧雲谷崑梅少菴
壽康張貫之傳仁孫小石綬昌許石生長齡若乃躬與是役
朝夕校讐樂事之畢交錯觥籌則有若合肥張楚珩士珩上
元秦伯虞際唐顧石公雲蔣紹由師轍江甯甘劍侯元煥鄧
熙之嘉緝甘子泌曾沂溧水朱豫生紹亭江浦侯杏樓宗海
手澤三世寶藏勿隊則有若上元朱少嶧傳葵其三人鼎足
分峙璀璨冠裳塲簾迭奏壇坫生光其樂無極發爲文章以
誌歲月永矢勿忘則主會者江甯翁鐵梅長森紹文長芬及
作是記者江甯陳伯雨作霖也

莫愁湖新建曾公閣記

蓋聞祠留峴首實羊公遊覽之區堂築平山本永叔燕娛之
所自來名臣功德碩輔經綸莫不於政務之閒極嘯歌之致

品題泉石藻繪山川以故遺愛常留芳徽不沫過習池而湖
簡行湖岸而景蘇玩草木之精神亦生愛敬當春秋之佳日
每切懷思此金陵莫愁湖所爲有曾公閣之建也夫曾公以
衡岳偉人作建康使相平江南而除巨憝鎮建業而活疲氓
迎竹馬於并州兒童皆識珥豐貂於西蜀節鉞三持裴令公
之勳名暇日常開賓宴范希文之剛介荒年不廢水嬉當其
極意綢繆苦心擘畫卽土木經營之頃寓腥羶洗滌之心亭
矗翠微護風雲於

宸翰洲尋元武啟棟宇於神祠復以西郭之間有湖一曲爲
盧氏鬱金之址是徐家湯沐之鄉命斧催斤對澗阿而栽秀
栽荷種菱借水月以娛懷陶桓公柳植武昌非緣玩物李鄴
侯詩除杭郡皆以便民自星隕耆十餘年凡尸祝者數萬戶

若茲勝境久薦馨香第奉之勝棋樓中猶列諸武甯王次大功坊後雖欣代有傳人益麓祠餘惜未別崇專祀因陋就簡君子病之今江南布政使奉新許公祇承

恩命開省昇州政通人和百廢具舉淵淳嶽峙一塵不驚爰眷往哲以舒翹遂就舊基而改作迴軒面水傑構凌雲聳百尺以巍巍啟入窗而洞達風晨月夕嘔啞與鳬鴈爲鄰鍾阜石城顧盼挹虎龍之氣馬光祖溪疏九曲鑒此澄泓陶通明樓結三層遜其巨麗以某月日興工某月日落成奉文正公遺像而祀之禮也嗚呼淵潭明瑟林壑縈紆雖生平未獲遂初而魂魄猶應樂此北牖獅嶺無限舊森南眺鷺洲互相環繞於以尊崇主祔敬矣神棲諸葛清高表羽扇綸巾之度昌黎嚴正慰太山北斗之瞻藻棟芝楣同茲不朽椒漿桂醕久

愈難忘英雄兒女各千秋不蹈爭墩之習懦立頑廉興百世
請看立石之詞

鍾山書院藏書記

蓋聞山登宛委實祕籍之攸藏地入嫺環爲羣編之所萃自
來勝境必聚奇書招多士之來遊慰生平所未見而況建業
名區無殊首善鍾山書院特闢講堂肇於雍正之初以迄道
光之季談經媿於虎觀探策等於龍威其間

御府之特頒官司之購集奎光粲爛星芒直逼三辰寶藏駢
羅巖穴爭窺二酉矣乃白黃巾肆虐紅襖傳烽頽垣壞瓦之
場難尊漢閣赤字綠文之籍空賸秦灰長恩之守無靈不獨
鼠蟲耗蝕中祕之儲盡散誰讐魚豕謬訛旣而日月重新星
雲並耀開雷次宗之講肆集胡安定之門徒雖鹿洞鷺湖制

度已經規復而螢編蠹簡部居尙未分儲屬以南皮張尙書之泣官番禺梁學士之主講師儒道洽賓主交融爰廣購夫陳篇以加惠於來學近取本省之所有遠徵鄰境之新聚官版精良校幾煩夫劉向檄文調發求不待於陳農十年之讀有資在舍者無虞枵腹四庫之收並富養士者庶可愜心乎抑蒙更有進者通天人之謂儒識時務乃爲傑自開瀛海之市益恢著作之林上行旁行競認佞盧之字內九外九羣矜騶衍之談誠蒐采其烏文以稍加夫象譯精而氣化之術粗而技巧之工小學則算數有傳大學則格致極粹實事求是豈性道之空言精義入神通陰陽之祕籀比四夷之納賁梯山航海以偕來知中國之尙文僭侏毘離無不納干頃堂遙其鉅麗萬軸樓無此恢宏從茲踞虎蟠龍瞻蔣家山之佳氣

行見騰蛟起鳳步天一閣之後塵云爾

食實軒記

食實軒者張楚珩同年之別墅也枕古冶之城麓接劍池之
山房平時迢迢叢薄掩映拓地盈畝植篁成林構精舍以栖
雲通長廊而避雨塵隨花落則纖紅不生陰壓苔鮮則一碧
如洗泉明之柳表宅懷素之蕉翳窗帷簾洞開几榻清潤雌
黃啜研時發古香蠅篆烏文自饒天趣每當清風蕩暑皓月
弄晴椅檻微吟披襟長嘯開三條之徑遙望故交賞一味之
涼不延俗客書繙子政之七略畫品長康之一廚霖於其時
曾陪雅集縱鄱陽之暴謔逞焦遂之高談酒酌在瓢偕竹俱
醉詩成屏紙刻筠留題可謂把臂晉賢追蹤唐逸矣乃孫琴
西太僕以虎觀之耆英樹龍門之碩望賦高軒過披輞川圖

亦復眷戀林泉流連邱壑一揮大筆肇錫嘉名此則阿閣未
傾覽德俟翔鳳之集元亭宛在撫華挹吐鳳之芬者與今者
遜學一叟墓草已宿爾我兩人廬苦各守撫琴尊於思話俄
成昔歡鬱霖雨於傅巖愈宏君抱所願仰瞻題勝益勵遠猷
每飯不忘君身江湖而心魏闕名下無虛士出功業而處文
章則於食實二字之義更有進焉行見泉流出山雲興布澤
謝安之志旣在蒼生裴度之情詎耽綠野他日過斯軒者感
茹蘆之室邇懷芝蘭之谷空李鄴侯雖去衡山藏書無恙王
子猷來遊吳下問主何須欲詠制青請看飛白平泉所誌息
壤證之

濠堂記

鄭君蘇龕作草堂於大中橋之北旣成招同人落之川流縈

紆交匯堂下酒酣作霖起而言曰是水也本楊吳之城濠南通秦淮北達潮溝南唐築宮憑以爲固圖經具載之矣夫偏邦竊據猶知守險而況中國之廣狹焉伺隙其備豫當更何如顧乃盡撤藩籬任彼馳突西溟東渤跬步可踰勇夫重閉曾徐溫之不若以濠名堂鄭君其有憂思乎秦君伯虞願而笑曰子之說似矣而未得鄭君之志也昔蒙莊觀濠能知魚樂天機暢遂物我兩忘今蘇龕方將泛浮查涉瀛海與鯨鯢狎居其於非我族類者必有以馴其鱗鬣挫其牙須風靜波平萬里一致歐洲雖遠皆作濠上觀焉可也蘇龕聞之喟然太息曰有是哉陳君之說權在執政非使臣所得與聞秦君之說則行人之責也予固將勉爲之言未畢顧君石公乘醉大呼曰不知許事且食蛤蜊予姑醉臥三年以俟蘇龕之歸

再集茲堂爲軟腳之局焉倘渝此約有如是水於是同人皆應曰諾時光緒丙申十二月十八日也

柏陰九友圖記

一名柏緣圖

夏氏僦居武定橋東庭陰有古柏一株生太湖石上天矯離奇秦礪泉學士瞻園中物也園本明桐城何閣老如寵故宅茲柏殆閱數百年矣光緒壬寅春正月旬容楊吟軒別駕毓恩讌客於柏堂酒酣徘徊樹下其危坐石磴左顧而笑者會稽俞恪士觀察明震也倚俞左而端視者貴池劉聚卿觀察世珩也欹坐柏根者江甯傅苕生觀察春官也或手攀條而首微側或蹲踞石上作欲墜狀或距柏獨遠其容若俯者上元夏氏三昆仲伯言孝廉仁溥叔梅上舍仁沂蔚如比部仁虎也長身鶴立神采奕奕者溧水濮青士太守文選也其左

少年則吟軒主人右與並立者則賤子作霖也之九人者仕
隱殊途老少異趣而忽與茲柏結一日之契賞玩摩挲極其
愛惜蓋緣爲之也噫唏噓今何時耶天地晦冥風雲變色諸
君子以英銳之資龍蟠鳳逸大之則聳霄漢蔽山岳次亦遇
盤根錯節自顯其材卽宦成息影者猶隱負棟梁之重望蒼
生冀其再起豈得常如今日之間適哉獨予老而且賤拳曲
臃腫不適於用方將偃臥空山自勵歲寒之節眴庭柯而怡
顏焉是諸君子與茲柏之緣淺而予與茲柏之緣深也然而
賞玩摩挲極其愛惜與茲柏結一日之契圖而藏之俾茲柏
附諸君子俱傳則緣之淺者亦深矣江甯陳作霖伯雨父記

新甯工藝廠記

代

嘗考周官太宰以九職任萬民五曰百工飭化八材疏云百

種巧作之工所爲事業此管子所謂工之子恆爲工也九曰
閒民無常職轉移職事注云無事業者轉移爲人職事若今
之傭賃雖未專言爲工而爲工亦在其中此閒民無業者之
爲工也又大司寇以嘉石平罷民凡萬民之有罪過而未麗
于法而害于州里者役諸司空注云使給百工之役此罷民
有罪過者之爲工也然則先王之於百工豈肯任其惰游而
不加策勵也哉我

聖朝居中御極薄海內外皆歸轡轂知歐洲以商立國製器
日精而工藝爲最重所以致富強者在此於是仿而行之首
善自京師始推行於各行省楚南大中丞爰飭所轄之府廳
州縣設局惠工新甯山邑也居民治生纖嗇有唐魏之遺風
力於農而工務未遑及余以菲才承乏三年於茲矣屢奉大

府檄有所興作乃謀於邑之士大夫將招民之無常業者與有罪過而未麗于灋者各就其性之所近俾學習手技以自養而養人其裨益於吾民甚大士大夫僉以爲然余因捐廉爲倡而劉紳鄧紳等皆輸貲以助之遂度地於捕署之東偏垣其外而中建大廠曰習藝廠廠旁爲屋二十間以居工作之閒民又置自新所十二間以居保任之罷民其餘司事丁役各有攸處膾庖湍濶咸備毋缺僅三閱月而集事亦可謂速成已夫無事業之民必能自食其力而盜心始不起於飢寒有罪過之民必能日習夫勞而惡心始不生於驕佚教養兼施實周官之良法美意而豈規倣歐洲之政也哉爰書其事之顛末以諭後來者冀其有舉毋廢或因而擴充之補成考工一記是尤余之所厚望也夫斯役也募捐者某官某監

工者某官某例得附書